


Reinié Jouveau

**La Bello
que dourmié**

Coumèdi en un ate e en vers



C.I.E.L. d'Oc

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

Reinié Jouveau

La Bello que Dourmié

Coumèdi en un ate e en vers

Groupement d'Etudes Provençales
13 - St-Remy-de-Provence

1969

LA BELLO QUE DOURMIE
Un ate en vers.

DECOR

L'acioun se debano sus lis Escalié dóu famous Castèu de Buous d'ounte l'iue descuerb un relarg de colo verdejanto, de prat e de jardin.

PERSOUNAGE

Lou Serviciau de la Princesso qu'es la Bello que (dourmié).
Lou Pouèto, uno meno de "Prince charmant"
La Bergiero, qu'es pièi la Princesso, la Bello que (dourmié).
Lou Gardian dóu Castèu e recitant.

Lou Pouèto

Adounc, vaqui lou rode e vaqui lou castèu
ounte dor la Princesso en vièsti blanquinèu.
O! bonur de touca lis escalié de pèiro
que touquèron si pèd e la font qu'enfresqueiro
un rode tant galant. Quet chale de pensa
que, de si blànqui man, a l'aigo caressa.
O! tèms , arrèsto-te, laisso enfin que regarde
cado pèiro e cado erbo, e que moun èime garde
d'aquel istant preclar un eterne record.
O! vole lou grava, pèr sèmpe, dins moun cor
l'image benesi que m'es douna de vèire,
pèr fin de retrouva, en regardant à rèire,
tant que viéurai, l'esmai que sènte dedins iéu
au moumen de touca l'us que me fara diéu.
Causo muto qu'eici me vesès, iéu, pouèto,
vous duerbe dins moun cor uno cauno secrèto
que jamai rèn, jamai, vous n'en pourra coucha.
Temoui de moun bonur que tenès d'agacha, -
moun pèd qu'apiando enca' coume ma man tremolo,
parlas-me, digas-me coume ei la bello drolo;
e s'es bello, digas-me qu'es bono tambèn;
senoun, de que farai, iéu, pauvre pau-de-sen,
emé mi quatre vers, se soun cor es de mabre...?
Moun Diéu! miés vaudrié s'escoundre dins un vabre!
Mai noun! tant de bèuta es facho pèr l'amour,
tout me lou dis, eici qu'es plen de sa belour.
Mai quaucun vèn. Moun Diéu! mai que siegue pas Elo!
Es qu'un serviciau; mourirai pas d'aquelo...
- Bèn lou bonjour, Moussu. Queto es vosto founcioun?

Lou Serviciau

Iéu, Moussu, siéu eici pèr la figuracioun.
Espère. Dèu veni un Prince magnanime
que, dóu som ounte jais coume au founs d'un abime,
revihara subran nosto rèino que dor.
E la rèino, autant-lèu, ié baiara soun cor.
Iéu, persounalamen, rèn me pourrié miés plaire
qu'ansin, moun bon moussu, me pourrié ana jaire.